



## JUDICIAL SYSTEM MONITORING PROGRAMME PROGRAMA DE MONITORIZAÇÃO DO SISTEMA JUDICIAL

### *Komunikadu Imprensa*

Períodu : Agostu 2011

Edisaun : 10 Agostu 2011

### **Komisaun Permanente Parlamentu Nasionál aprova viazen Prezidênte da Repúblika bá Repúblika Myanmar**

Iha loron 8 fulan Agostu 2011, Komisaun Permanente Parlamentu Nasionál hala'ó Primeíra Sesaun Plenária hodi aprova rezolusaun Númeru 71/II bá pedidu vizita estadu husi Prezidênte da Repúblika Dr. José Ramos Horta ba Repúblika Uniaun Myanmar. Aprovasaun bá rezolusaun ne'e pasa ho votus afavor 14 no absteinsaun 1.

Diretór JSMP Luis de Oliveira *haktuir katak JSMP sente haksolok ho komitmentu no vontade husi distintus deputadu sira ne'ebé kontinua servisu iha tempu resesu no kongratula Parlamentu Nasionál tanbá consegue halibur representante membru partidu/bankada sira hodi hari'i Komisaun Parmanente atu atende asuntu ka pedidu urjente sira durante tempu resesu nia laran.*

JSMP hanoin katak funsionamentu ba Komisaun Permanente presija duni, harê ba kna'ar Parlamentu Nasionál ne'ebé importante tebes atu hola pozisaun representa estadu iha kualker situasaun ruma.

Komisaun Permanente rasik foin hahú sira nia sesaun plenária ba dala uluk durante períodu resesu, hodi nomeia mós Sekretária bá Komisaun Permanente Sra. Deputada Aicha Basarewan husi bankada Fretilin. Membru komisaun permanente hamutuk nain 27; kompostu husi bankada hotu no Prezide direktamente husi Prezidênte Parlamentu Nasionál Fernando Lasama de Araújo.

Tuir observasaun POP nian, antes ne'e, Komisaun Permanente ne'e la funsiona tanbá membru Parlamentu hatama tarde lista naran ne'ebé atu submete iha Komisaun refere. Hafoin kria tiha, tuir Rejimentu Parlamentu Nasionál nian, plenária ba Komisaun Permanente, hala'ó bainhira iha pedidu ba rezolusaun viazen ruma husi Prezidênte da Repúblika ka pedidu urjénsia ruma husi governu. Maibé maski la iha sesaun plenária, JSMP nota katak, membrus parlamentar husi komisaun permanente balun ativa iha Parlamentu Nasionál, hodi atende povu balun ne'ebé ba hato'ó sira nia lamentasaun.

Entertantu, Pedidu viazen Prezidênte da Repúblika diriye bá Parlamentu Nasionál ne'e bázeia ba alinea 1) artigu 80 Konstituisaun RDTL, ne'ebe fó kompetensia ba Parlamentu Nasionál ka Komisaun Permanente atu fó autorizasaun ba kualker viazen Prezidênte da Repúblika bainhira sai bá estranjeiru.

JSMP nafatin enkoraza Komisaun Permanente Parlamentu Nasionál atu nafatin hala'ó sira nia kna'ar no funsaun ho didiak nune'é bele responde ezijénsia urgente ne'ebé hato'ó ona tantu husi Governu, Prezidénte da Repúblika nomós husi Parlamentu Nasionál rasik, basá Komisaun Permanente rasik iha ona ninia Sekretária ne'ebé nomeia ona iha lora 8 Agostu 2011.

Atu hetan informasaun kle'an favor kontaktu direktamente:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
Landline: 3323883/7295795